

## La Lettre Jèrriaise Sanm'di lé douze du mais d'Août 2023.

Bouônjour bouonnes gens. Ch'est Jean L 'Maistre dé L'Êta tch'a l'pliaîsi dé vos présenter la lettre Jèrriaise aniet, Sanm'di lé douze du mais d'août, deux milles vîngt-trais.

J'sommes souo-disant dans l'mitan d'l'Êté et Dgieu mèrcie qué l'temps est un mio pus bé ches jours! Mais y'a eune semaine, San'mdi pâssé, siez nous à l'Êta, ch'tait eune véthitabl'ye tempête! En mé, y'avait des biancs j'vaux à pliein et même les mauves avaient d'la peine à voler! Ch'tait vraîment chein qué nou-s'attendrait d'vaie en Hivé! Pour mé qu'est mauvais matelot, j'avais pitchi pour les siens qui viageaient en baté. Quand j'vai la mé rude comme ch'la, j'sis si content d'aver les deux pids bein pliantés sus tère!

J'avons eune magnifique veue d'la maîson à l'Êta et nou vai dé la Corbiéthe jusqu'à l'Êtac'sé. Châque jour nou vai tchiquechose dé difféthent, qué ch'sait la mé basse ou haute. Nou vai eune mâsse dé rotchièrs à mé basse bein seux, et presque pas du tout, à mé haute!

Ch'n'est qu'eune pétite partie dé la côte dé l'île, mais auve la côte du Nord, ch'est partie d'Jèrri tch'est hardi apprêcyie par les touristes et tous tchi d'meuthent ichîn.

Malheutusement nou n'peut pas en dithe autant d'la Ville dé St Hélyi. Pour dé mé, j'pense qué ch'est eune vraie tragédie. Ch'n'est pus lé Jèrri qué j'avons connu avec des bâtisses assez p'tits et en proportion dé not' pétite île. Chein qu'nou peut vaie es'sait bein à propos dans eune grande

ville en Angliétèrre ou ailleurs, mais cèrtainement pas dans not' belle pétite île! Bein seux, j'sis un p'tit mio des cheins qué nou dit qu'i sont d'la vielle école.

Tchuthieusement assez, jé n' crai pon qué ch'la împressionne nos touristes, cèrtainement pas assez pour les encouothagi d'èrvénîn eune deuxième fais pour vaie les "grands bâtisses" en Ville!

J'pense qué les touristes veinnent pour apprêcyi la bieauté d'l'île, not' histouaithe, et étout l' hospitalité aue les mèrveilleux r'pas prépathés par nos bouôns restaurants, et lus confort dans l's' hôtels. J'voulons lus faithe la beinv'nue, exactément comme nou-s'-attend d'èrchéver quand nou visite un pays étrange!

V'là tchi m'fait penser ès vacances et, comme bein d'autres, j'admets qué j'n'avons pas sorti d'l'île pour nos promener dépis l' c'menchement dé chu fichu virus. Ayant dit ch'là, tchuthieusement assez, j'aimons bein rester en Jèrri. Y'a tellement d'choses et d'pièches à visiter! Même lé solé couochant souvent est un spectacl'ye încriyabl'ye et janmais lé même, deux jours dé siette! Si nou c'menche à compter les baies autou d'l'île et les sites historiques, lé Mûsée qu'est mèrveilleux, les châtchieaux, lé Par ès animaux à la Trinn'té et mêmes les p'tites routes sustout dans les Pâraisses. Ch'est absolument împôssibl'ye dé s'lâsser dé toutes ches bouôntés qué j'trouvons tout autou d'nous! Jèrri est vraiment un p'tit paradis et j'ai d'la peine à comprendre les gens tchi veulent lus écapper dé l'île à châque oportéunité. Sustout dreinement auec la chaleu au sud d'l'Ûrope et les bouaîs'sies à feu. Ch'la a 'té eune vraie tragédie dans touos ches pays.

**Pour dé mé et ma bouonnefemme, eune visite ou deux en Nouormandie ou la Brétangne dé temps en temps est vraiment suffisant. Ch'n'est pon liain et nou peut gouôter lus produits si frais et lus bouonne tchuîsinne avec du vrai cidre ou du bouôn vîn.**

**Eh bein n' en v'là assez pouor aniet. Mèrcie pour m'aver êcouté et à la préchaine.**